



Cannabisoliat CBD-mik (cannabidiolimik) imallit aamma annerpaamik 0,2 % THC-mik (tetrahydrocannabinolimik) imallit unioqquitsinertaqanngitsumik pisiarinqarsinnaanngornissaannut nioqquutigineqarsinnaanngornissaannut kiisalu eqqunneqarsinnaanngornissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

(Siullermeerneqarnera)

Annerpaamik 0,2 procentimik THC-mik akulinnik cannabisimik nioqquutissiat (tassani cannabisolia aamma eqqarsaatigalugu) inerteqqutaajunnaarsinnissaannik Naalakkersuisut suliniuteqaaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Peter Olsen, Inuit Ataqtigiiit)

(Siullermeerneqarnera)

Danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaatitut akuerisaanngitsumik cannabisimik nakorsaasiillutik nakorsaanissamik periarfissaqarlersillugit misileraanermik aallartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Peter Olsen, Inuit Ataqtigiiit)

(Siullermeerneqarnera)

Demokraatit siunnersuutit nuannaarutigaat, cannabisolie-mik annerpaamik 0.2% THC-mik (tetrahydrocannabinol) imallit unioqquitsinertaqanngitsumik pisisinnaalernissamik, tuniniaasinnaalernissamik atuisinnaalersitsinermik imaqarmata, saniatigullu nakorsat cannabisimik nakorsaasiillutik nakorsaanissamik misileraasinnaanissaanut periarfissaqarlersillugit.

Inuup kialluunniit CBD atorlugu katsorsartinermi pisariaqartitai, iluaqutigunigillu nipaallisaatigisinnaasai inuunerissarnissamullu periarfissaasariaqaraluarput. Periarfissaq manna inuup kiffaanngissusianut nukittorsaataammat Demokraatinit isumaqataavugut.

Isumaqqanngilagut innuttaasut napparsimasullu allatigut katsorsartinnissaminnut pisariaqartitsisut tatigisaajunnaarsillugillu pinerluttunngortissagivut. Aammattaaq nakorsat paaqqinnittullu innuttanik napparsimasunillu ikiuerusuttut pinerluttunngortissanngilagut. Kissaatigaarput suliassami peqataasut cannabisolie-mik atuerusunnertik kattuffigalugu suleqatigiilluarnissamut periarfissinneqassasut.

Isumaqarpugut inissaminiittoq innuttaasut ataasiakkaat nammineq aaliangersinnaassuseqarlutik inuunerissarnissamut periarfissinneqarnissaat, taamaalillutillu inuunermi naleqartitaminnut amerlisaasinnaanissaat, nammineq toqqagarigunikku imaluunniit nakorsamik isumaqatigiissuteqarnikkut



arlalinnik periarfissaqartinneqassasut. Innuttaasut nakorsallu akornanni tatiginninnerunermik aqutissiuussissaaq, atuisullu allatut katsorsaariaassinik ikorfartueqataasinnaasutut misileerusuttut nakorsarneqarnermikkut akisussaaqataalersinneqassapput.

Inuit ataasiakkaat namminneq katsorsarneqarnermikkut inuulluataarnerunissaminullu toqqaasinnaatitaanissaat periuseq killilersuerusunngissumermik imaqarpoq, taamaalillunilu pisortatigoortumik allaffissornermiik avissaartinneqarluni. Ullumikkut imaappoq innuttaasut ataasiakkaat akuerisaanissamut ingerlatseriaaseq aqqusaaqqaarlugu cannabisolie-mik atuinissamut periarfissinneqartarput. Aporfissaasut peerniartigit Inatsisitigullu akuerisaalertillugu. Soqutiginnittunut, susassareqatigiittunullu tamanut ajornannginnerulissaaq taamaaliorutta.

Taamaalillutalu partiittut allatulli isumaqarpugut misileraanermik aallartitsisariaqartugut, taamaalilutik nakorsat nakorsaaitut akuerisaanngitsumik cannabisimik nakorsaasiillutik nakorsaanissamik periarfissillugit.

Atuisut akornanni misilittakkat takutippaat CBD-oliani atuneq anniaatinut nipaallisaanermut, nererusussuseqannginnermut il. il. iluaqutaasartooq, tamaalinikkullu inuit ataasiakkaanut ilaqaataasunullu isumaqalerujuusinnaalluni. Nipaallisaataaginnarani inuunermik tallisaataasinaavoq, nappaatip malunnaataanik nipaallisaasinnaamat, taamaalillunilu inuunerup naleqarnera inoorusunnermullu annertusaasuusinnaalluni. Asasat inuunermi taama sakkortutigisumi perulunnerup nalaani pitsaanerpaamik atugaqarnissaat kiap misigerusunngilaa? Tamannami isumaqarpugut inunnik isiginnittariaatsimik pitsaasumik takutitsinerusoq, neriulluppugullu ataatsimiittarfimmi tamanna tamatta isumaqataaffigumaaripput.

Ulluinnarni napparsimavissuarmi DIH-mi uninngaviit ilaanni aqutsisutut sulininni napparsimallutik perululersimasut uninngasullu toqulersut takusarpavut, tassanilu paaqqinnittut nakorsallu ilaatigut nukillaajummertarput uninngasut anniarunnaarsarneranni pitsaanerpaamik nakorsaanermi tunniussassaarukkaangamik. Naak ilaatigut aamma napparsimasooq Danmark-mi katsorsarneqarsimanermini olianik atuisimagaluartoq.

Tamaamat napparsimasut innuttaasullu pisariaqartitaminnik atuisinnaanerannik akuserseqataaginnarata, sulisuusulli aamma napparsimaruluttunik toqulersunillu atugassarititaannik nakorsarneqarnermikkullu pitsaanerpaamik toqqagassaqartikkusuppagut, tamannami paaqqutarinninnermi piginnaasani pingaarnersaamat. Isumaqarpugut ulluinnarni misilittaasunut tatiginninnermik takutitsinerusoq. Ulluinnarnilu ajornartorsiutaasinnaasunut akunnattoorfillit naammassiuminarsarnissaat akuersaarparput.

Ilisimatusarnerup takutittuarpa CBD nappaatip timikkut tarnikkullu pitsaanngitsumik malunnaataanut annikillisaataasinnaasooq, sulilu ilisimatusarfigineqarpoq CBD kræftip celleanik nungutaasaasarnersooq imaluunniit peerutisvittarnersooq. Ilisimasat nutaanerit malillugit CBD-oliat inertequtaajunnaarsinnissaannut tunngavigineqartut nakussatsinneqaannarput.

Taamatut oqaaseqarluta siunnersuutit pingasuusut Ilaqutariinnermut Peqqissutsimullu ataatsimiititaliamut innersuuppagut.